

Neemo die Rache des Vater der Mutter und der Engel



Wo dä Neemo gschtribän isch
hanis ghöört

Piuoaäueiöänghrrrrrschfff
hani ghöört
ung gschpüürt
ung gschmökt
ung grochä
ganz hinän adä Nasä
hinän am Halszäpfli
salzigsüäss un pitär un zuur
wiä Fläisch unt Schiisdräk
und Äärdä un Tintä
wi Chrüsäliwassär Höllätunnär und
Ängälchöörsuusä
aber äü wiä zächä Lääm wonäim fäschtikä
chönnt
Ch han ä schwääri Ängi ghaa abär äü ä
liächti Wiiti bis zur Unändlichkäit
wo dä Neemo und ich
immä zämä xuächt händ

*Tä Neemo sch achtäfüfzgi
Dä Neemo sch achtäfüfzgi*

Ali sind um dä Neemo umä gumpäd
und häng xungä

*Tä Neemo sch achtäfüfzgi
Dä Neemo sch achtäfüfzgi*

Dä Neemo hä Gebuurztag gha
ump mä sin tur dä halb tunkli
Kaschtaaniäwal gangä

Nu mängisch häng grelli Sunäschtraalä du
Pletr i dä Böim plizt
uf Pletr wo fäwelkp fom letschtä Jaar am
Bodä glägä sind

Zämä mit dänä fo dä Jaar
un zämä mit dä wäichä Schtachlä fo dä
Kaschtaaniähülschärä
sinz fiin um öisi Chnöchl gschtrichä

T Schrit häm pim Lääfän im Läub äso
graschlä
tas män im Passgang gschlarpäd
unt nöd nu umäghüpft und umä gumpä
zind

Bim gumpän abr hämmä Päi höchufä
grüärt
odr hindärä gschlezt
und häng xungä

Dä Neemo hä Gebuuztag

Dä Neemo sch achtäfüfzgi

Zeescht häz dä Neemo äu lushti gfundä
un zogar fasch mitanzät
wämä sinä Hüpfär wö tanzä sägä

Ump mä händ no andäri Fäärsli xungä
win öpä

P Mülläri hä zi hät

P Mülläri hä zi hät

P Mülläri hät id

Hoosä gschissä

S Hämp fäblüätät

und färissä

Pöllä drübär abä drübär abä

Pöllä drübär abä drübär abä

Pölän us där undärä Trukä

Pölän us där oobärä Trukä

Pöllä drübär abä drübär abä

Im Waltach hä tä Wing gruuschäd
un ti ganz Luft häp fo Insektägebrum
wibriärt

und äp Fögäl hämp Fäärsli xungä
ti äint Amslä gägä di andär

Zeesch sin tä Neemo und ich foruus
for dä Früuän un tä chliinä Ching gloffän
abä ch ha gaar nö gmärkt wiän äär und ich
langsamä wordä sind
und igändwiä dän am Schluss gloffä sind
wiit hindär dän andärä

Ch ha mini hööchä Schuä nomal müsä
bindän un Knüsi ufäziä

Ch ha mip mä Schtäkän im Läub umänang
gschtochärä pim Abäläufän
abä kä böösi LäubUnghüür uufgschücht

Mi tär andärä Hand hani dä Neemo
ghebäd

Taa hä tä Neemo grad irgänd öpis xäi gha

Ch ha grad nöd uufpasst

Abr won r schtaa plibän isch
hät r nüüp me xäit
und ich ha niä mee chönä wüssä
was är dänn äch grad häp welä fäzelä

Ch ha dä zeescht ä gaar nö gmäk tas r
nüüp me säit
wo di andärä wiit foornä
wo mä s nümä xee händ und
nu no liisli ghöört händ
widär aagfangä händ

Tä Neemo sch achtäfüfzgi

Dä Neemo sch achtäfüfzgi

Taa sch dä Neemo nämli ganz äifach
schtaaplibän
und hä zich as Häaz glangäd
ump fes ch gschnuufät

Un tän isch r ganz komisch gschtüüchlät

Dä Neemo sch ja n groössä Maa xi
uf all fäl fil gröössär as miin Fatr

abä däa isch ja äu än psundrix chliinä Maa
Wä mä soo grooss isch wi dä Neemo
dänn gheip mä fo wiit obän abä

Dä Neemo isch nöd übr öppis inä
gschtüürchläd
Näi är isch iirgändwiä wi mi tä Chnüü
hangä plibä

Aso wi wäng Knüü nöd wiitä chönntäd

Untän isch är foornän usätätscht
äifach mitäm Xichp foraa usätätscht
abä klöpfd häz doch nööd

Dä Neemo sch im Läub glägän
und hät wi Toozi gschpillt

Ch ha scho Schiss übä cho
das äs gaar käs Schpiil isch

Ää hä zich sichä nö könä aagschlagä ha
unz isch ä nüü tee glägä
won r drübä he könä gscholpärä zi

Äär sch im Wäichä glägän
und ich han äm dä Chopf usäm Läub
glupft und uf mini Chnüü gläit

Ch han äm di fäwelktä Bletär us sinä
Stäkähaar gläsän und äm ächli Dräk usäm
Xich gwüsch

Daa hätr t Äugän uufgmacht
und nomal öpis welä sägä

abä däbii hät r nu no Tschnörä uuf un zuä
gmacht
ooni das r n Toon usäpraacht het

Und r häp mi mit uufgrissnän Äugän
aagluägät

Ch hanän äifach nöp fäschtandä

Da hät r d Äugä widä zuägmachd

Dä Neemo sch dä
beschp Frümp fom Fips xi
Dä Fips da sch min Fatr

Dä Neemo un tä Fips hän zich scho kännt
wo beed no jung xi sind

Abä dä Neemo sch mindischtäns
zää Jaar eltr xi wi min Fatr
un tä fil gröössär äu

Si häm pee käi Schtuz ghaa
un zämä d Aarbäzloosäziitig gmachd

Dä Neemo sch dä Redaktär fo dän
Aarbäzloosäziiti xi

Das häis
tä Neemo häp fasch aläs sälbär gschribän
un tä Fips isch Ziiti go fächäufän
uf dä Schtraas und in alnä Bäizä

Zeerscht hänz Ziitig zämä welä go
fächäufä
abä das hät nöp funktioniärt

Dä Neemo hät nöd welä
das öpä köng xee
das äär muäs sini äigä Ziiti go fä chäufä

A däm Taag vos händ welä
zämä gogäd Aarbäizloosäziitig fächäufä
hä tä Neemo bi jedärä Bäiz vos kännt
händ nöb welän inä
und wänn dä Fips luut uusgrüäft hät

Aarbäizloosäziitig

isch dä Neemo fasch im Bodä fäsunkän
odä hät öpis imä Schäufänschtä gra
tschäurig wichtig gfundä

Chumä gönd no chli wiitär usä

Immä mee sinz id Ussäkwartiär choo
wo mä käi Aarbäizloosi hät welä xee
unt scho gaar nö tätig
wo äno luut uusrüäfä
tass aarbäizloos sind

Dä Neemo sch Schriftschtellär xi und hät
mängisch äno für andäri Ziitigä gschribä

Abä fil Gäld hät r ä mi täm nö könä fädiänä

Ich gläub äär hät immä
numän äis ächli fägilpz Hämp ghaa
und nu äis Paar Hosän
ung ganz uusglaatschäti Schuä

Diä sind äm ez abghei xi

und ich ha xee das Zölä abgloffä
und a bäidä Füäss fasch durä xi sind

Wo dä Neemo so am Bodä glägän isch
isch Zii schtaa plibä

Äs Amäisli sch übä mini Chnүүsökä
klätäräd
uf mini Huut abä und übäs Chnүү
uf äm Neemo siini Baggä

Abr ää hät nö truf reagiärt
äär isch bläich xi
ganz wächsich chalti Huut hät r gha
und uf dä Schtirnä Schwäiss

Ich han äm d Amäisän äwägschtrichän
und han äm dä Chopf uf mis
ChindärRuksekli gläit

Ch bin näbäd än anä xässän
und ha gluägäd
win än groossä schwarzä HirschChäfar
mit füürootm Gwei
übär än tunkälbruunä fasch fämoderätä
ump fo Madä fäfrässnä Holzchloz
un tän übär ä paar Schtäi
i Zunä chlätäräd isch

Än andärä Chäfar
mit schwarzäm Chopf und rootä Flügäl
isch a mänä Graashalm ufäkräsmät
un tänn hät ä p Flügäl uuftaa
und isch liislig däfoo gflogä

Undär äm Neemo siim Ruggä wär än
Amäisäschtraass durägängä

Abä wils deet nümä durä hän könä
sin t Amäisä immä mee übä dä Buuch fom
Neemo choo

S Hämp isch äm ufägruscht
und si sind äm übä dä blu Puuch

Deet hänz dä Haar müäsän uuswiichän
und dä Schwäisspärkä

Dä Neemo hät nämlich ä dee gschwitzt

Wäni draa zrugg tänkä mäini s
seg ganz schtilä xii
ump mä heb nüüp me ghöört

Abä d Luft hät immä no gwimmärät fo
Insektägebrumm
und immä no hep mä dä knallbläu Himmäl
tur s ruuschändi Bletrtach fämuätä chönän
un ti jungä Bussardä
won irä Muätär grüäft händ

Dä Neemo hä xüüfzät

Drizää Näch pefor dä Neemo
zämäprochän isch
simmä färussä
foräm Färiähüüsli
näbät änand uf äm Bodä glägä

Äärm um Päi hämmär usä gschtrekt

und händ in tunkäl lüüchtändä Himmäl
ufäglügät
zum Zii xee wo raasäd

T Schtärnä zäigä Ziiit nu langsam
ooni tas märksch trüläz fäbii
das häist raasä xeesch Ziiit ebä nööd

Tu xeesch eesch tas Ziip fäbii gangän isch
wänd än Momänt nöd uufpasst häsch
willp märksch
tas t Schtäärnä wüürkli nümä ganz dee
zind
wos forhäär xi sind

T Schtärnä sind abär
in Wüürklichkäit immä no deet
wos sind
nu mii händ öis nämlich undär nän äifach
wiitär trülät
ganz langsam
un toch raasänd schnäll

Dää Momänt müsp mä chönä waarnä
wo mä nöd uufpasst hät
gad wo Ziiit fäbii gangän isch

Wisoo das mä so glägä sind
zum daas xee

T Unäntlichkäi xeesch ebän eescht
wän gaanz laangsam gschpüürsch
wi grooss das aläs isch

Sogaa s Liäch pruucht ä ganzi Sekum pis
zum Moond und

zu dä Sunä sogaar mee als acht Minuutä

Ja

*abä s Liäch kunn toch fo dä Sunnän
ump fom Moond*

Ja

und ä s Lääbä

*Um p Mänschä und ä Tiär
hät äär ächläärt*

Dä Neemo hät aläs gwüsst
won ich ha welä wüssän
und no mängs mee

Ez isch äs Äichhöörnli cho
go luägä was mi daa machäd

Abä wos ä nö truus cho isch
was daa los isch
isch äs mit filnä Rük und Hält
widär uf än andärä Bäüm däfo

Fasch gliich wi churz nachhär äs Äidächsl
won übä d Schtäi idä Sunnä ghuscht isch

Dä Neemo sch dä liäpschp Mänsch xi

Wisoo

Aso dä Neemo häp mä d Wält ächläärt
t Elektronä wonum där Atomchärn umä
rasäd
wi Planeetän um Zunä
odä dä Moond umt Äärdä

odä filichp mee
wi FLÜügän umän Chuäfladä

Luäg

*taas ischp Milchschrass
Daas wo da übä dä gaanz Himäl gaat*

Ja

Milioonä fo Schtäärnä

Ja gäl

*Ump fili Schtäärnä sind gar nöd Schtäärnä
sondärn Galaxiä
riisigi Hüfä fo Schtäärnä fo riisigä Hüfä fo
Schtärnä fo riisigä Hüfä fo Schtärnä*

Ja ää

*Liächt und Schatä
käni durdä Neemo
un t Unändlichkäit im Groossän
und im Chliinä*

Wän t Äärm usänan tuäsch
un t Äügä zuä machsch
dän wirz dä nöd numä trümmelig
sondän mi tä Zii gschpüürsch
idä Fingäschpizän äs Chrüsälä
wi wänz t Unändlichkäit würdä perüärä

Du musch di nu gnuäg wiit usä schtrekä
und wänns nöd wii gnuä gaat
dänn tööfsch nöd uufhörä
sondärn tänkä
dir forschtellä
äs gäch gaanz wii tussä
no wiitär

und immä no wiitär

Und wänns dään chrüsälä
täng gschpüürsch
das idän Unnändlichkäi köntsches aachoo

Dä Neemo hät ä Naarbä
uf dä Schtiirnä gha
linx
scho fasch undä dä Haar

Mäischtäns hät ä Schträänä drübä
gluägäd un t Naarbä fätekt

Abä jez isch ä chli Schwäis drin xi
win än chliinä Täich
äs munzix bläichs chäsix Plaschtikbeki
mit ämä Tropfä drin

Äm Neemo sini Naarbän isch fasch
wi diä fo mim Grossfatä xi
ä chliini tüüfi alti Naarbän uf dä Schtiirnä
deep wo t Haar aafönd
wän t no Haar häsch

T Naarbä fom Grosbapi sch än
Schträifschuss xi
hindr dä Schtiirnä
ä Schussnaarbän fo dä Schlacht am
Aamuur
im RussischJapanischä Chriäg

T Naarbä fom Neemo sch abär ä chlii
wiitär foornän as bim Grosbapi xi

Hät ächt äinän äm Neemo fon unän ufä

fasch ing Chopf gschossä

Dä Neemo hä zich amix mitä Hand ad
Naarbä glangät
Wisoo han i no lang nö gwüsst

Ch ha scho forhär ä Bräämän uf mim
Nakä gschpüürt un too gschlagä
da han i äini uf äm Neemo siim Hals xee
ump mitä Fingä pakt und fätrukt

D Unändlichkäi köntsches dr no bald ämal
foorstelä
abä si gschpüürä
das isch s Schwirigä

Ja
d Wält isch filich zää odä zwänzg
Miliaardä Jaar alt
abä da sch ä nur ä Zaal mit zää Ziffärä
ZäämaalZäämaalZää

Wän äs unsichpaars Püntkli uufblaasich
un tiä Chuglän inärä Sekund
schon ä Miliaardä maal gwachsän isch
dän häsch immäno fil Zii
pis d Wält äs Duzänd Miliaardä Lichtjaaar
gross wordän isch

Chasch ä Chuglän i Gedankän äu
unäntlich gross uufblasä
däng chäämsch nach är än Unändlichkäit
widär an gliichä Punkt
wän d rund umä gaa chäntisch

Odär äu äs Mööbiusband

chöntscht äso unändlich fägrössärä

Äs Mööbiusband isch sonäs achi förmix
Band

wo so fäträä zämäkläbäd isch
dämit niä uf di andär Siitä chunsch
odär nu no uf di andär Siitä
und niämee zrug

Aso und wänt Wält i filnä Dimensionä son
äs Mööbiusband wäär
däng chunsch nach ärän Eewigkäit widär
an gliichä Punkt

Abä du bisch uf där andärä Siitä
un kunsch doch widä nö deet anä zrug
wot hää choo bisch
ump fäschwintsch in unändlich filnä
Dimensionä
bis in ali Eewigkäit

No intäressantär isch s
wän s Band ersch i dä flachän
Unändlichkäit zämäsezisch

Dänn wäisch nämli nöd ob uf äm Chopf
odär uf dä Bäi zrug chunsch
und öps än Chnopf git wi bi mänän Achi
odär ä rundi Wält win än WeloPnö

Un tu müsstisch dich äntschäidän
öps än Unändlichkäit wüürklich git
odä nöd
und ob dee tä liäb Got hokt
wo Pändär so odär andärsch zämäsezt
odäär

Ä Flüügän isch zeersch di längsch Ziit um
mini Nasä umä gflogä

Ch ha si welä fäschüüchän
abä si isch eesch gangä
wo si bim Neemo zwüschätä Bäi öpis
gschmökd hät

Ja mä hät no mee als numä unsichpaar im
Bodä käimändi Pilz und Modr gschmökt

Wo nip Flüügä ha chönä fangä
hä tä Neemo d Äugä widär uufgmacht
un xäit

Hälfä laa

Hät är wüürkli öpis xäit

Hätär daas xäit

I bi fäschrokä
will dä Neemo
häp mi doch eerscht ä paar Tääg forhär
gfröögät
wiso das ich immä son än Plöffär müs sii

*Mängisch musch äu duu diir hälfä laa
sälbä tänkän isch scho guät
du wäisch nonig aläs un
kasch nonig aläs*

Abär ää hä glachäd
won ich druus äs Fäärsli gmacht han

*Puäpmämuä
jamäsöll
jamäsöll
Hälfä laa
Hälfä laa
Tralldirjaa*

Dä Neemo sch dä liäpschp Mänsch xi

S hät iitUnggläd
unz isch scho chli chalt wordän
und ich ha müsä go brünzlä

Piänli unt Hummäli händ nümä xummt
s isch ä käis Tiär me choo go luägä
un tä Neemo hät ächli mee gschtunkä

Ich han aagfangä rüäfä

*Hiilfe
Hiilfe*

S häp mi niämä ghöört
ch pi filich ä nö gnuäg luu xii

Dä Neemo häp mi widä gfürchig win än
groossä Fisch uf äm Land aagluägät
unz Muul uuf un zuä gmacht
ooni non äs Wor könä zägä

Äär hä ghuäschtät
un t Äügä widä zuägmacht

Är hät Äügä dän nomal uufgmacht
ump mi mit sim schlaffä wachsigä Xicht
aagluägä

tas i nö gwüsst han
was är äch könn tänkä

Sig nö zon än Plöffär

Dä Neemo hä teet ämäl ä xäit
ich söl ächli mee zuälosän und nöd numä
sälbä welä plodärä
ung grooss aagää

Wo mär Möbiusbändär paschtläd händ
Häm mär äu Wortspiili gmacht

Sgit Wöörtä wo fo fornän und hinän ä
Bedüütig händ
so wi zum Biischpiil NEGER und REGEN

Odär no bessä sind Palindroom
wo fo fornän ump fo hinä sgliich bedüütäd
KAJAK
REITTIER
ANNA odär
HANNAH

S Pescht hä tä Neemo natüürli ä kännt
EIN NEGER MIT GAZELLE ZAGT IM
REGEN NIE

Miin Namä sch hindätschi nurän
Chrüsümüsi
und Fips häist umgekeert Spif

Abä däa fom Neemo hät natüürli scho
öppis bedüütäd
fo fornän ump fo hinä

Dä Nemo hät siin Namä ja au uusxuäch
gha

Än Namä hät immär ä Bedüüütig

Untän hätär uf Latiinisch xäit
NOMEN EST OMEN

Dä Neemo hä zich Niämär gnännt
Neemo sch nämlich Latiinisch
und häist Niämärt

*Wil Niämär bini
Niämär bini xii
und Niämär wirdi sii*

Und ich bin än Fäigling

*Wäni mini Gschriibsäl nämli mipmim
äigätä Namän underschriibä wüür
tänn chönntäz mi ja no cho go holä*

*Näi Neemo
Du bisch doch kän Fäigling*

Dä Neemo sch nämli sogar is Chefi
fü sini Übäzüügigä
un taas isch sichä fil bessär
als für dä tüütsch Käisär
gogä Lüü
töödä

Ch han än Graashalm abgrissän
ump mär än is Muul gschtekt
soo wis dä Neemo gmacht hät
wän är amix zwenig Schtuz ghaa hä

zum sich ä Zigi zläischtä

Ch ha mi nö getrout
äm uf dr Aarm zliggä
will är hep mi ja nö könä sägä
öb äm min Chopf zschwäär wüürd

Bin ich iigschlaafän
odä han i wach tröimt

Tä Neemo häp Färsli prünzläd ung xungä

*E zig toch mal schtiilän
un los mä chli
Los mä chli
Los mä chli zuä*

*Gii gampfä
Wassä schtampfä
Wassr ab dä Röörä
Ez Püäbli hep di Schnöörä zuä
Ich mag di nümä ghöörä*

Ä hä kaarchläd
Un tän no ghuäschtät
Ä hät no paar maal ghuäschtät

Dänn hät är nö gschnuufäd
und ich ha scho tänkt
ez isch r toot

Abä zum Glük isch r noni tooxi

Dänn hät är nämli wiitr gschnuufäd

Untän ä paarmaal ganz tüüf

bevor är widä normaal gschnuufäd hät

S hä tän äu immr karchlä pim Schnuufä

Dän ischr doch gschtorbä
dä Neemo

Ch has nö gmärkt
won är i sini Eewigkäit abghäuän isch

Sisch halt ä widä son än Momäng xi
wo Ziip fägangän isch
befor gmärkt häsch
das gad ez hetsch sölä uufpassä

Dä Neemo sch achtäfüfzgi wordä

Daasch alt
odr

S isch ganz schtilä xii
Mängisch hätz ganz idä Nööchi knaxäd
odr dänn hätz mängisch ächli graschläd

S isch ganz tunkäl xi
schwarzi Schätän
übär no schwäärzärä Schätä

Guät
aso wäng gnäu gluägät häsch
häsch übäräm Neemo siim Buuch übärä
scho xee
wo dä Wääg häärchunt

I dä Bletär
häsch ali schpizigä Formän

und Umriss fo diinä gfüürchigschtä
GschpängschtrFantasiä chönä findä

Dä Himäl häsch hööch obä
nuno als tunkäls Lüüchtä fämuätät

Fogeschtär isch doch no Folmoong xi
Aso muäs dä Moond ä bald widär uufgaa

Di schwaarzä Schätä sind win
überänand schwingändi
odär überänand tanzändi
Schääräschnit und Schlingpflanzä xi

Odä s isch win imänä riisigä Uurwärch fon
ärä Täschanuur xii
wo dä silbrig Tekäl zuä isch

Äinä hät Uur in Fluss grüärt
und än Fisch hät Uur fäschlukt

Äm Neemo sini Schwöschtär um p Muätär
sind übäs Tektäbrüggli gloffä

Abä si händ nüü xee
odä nö tä gliichä taa

Dä Fisch hätz Muul uuf un zuä gmacht
un tä Moond isch us äm Muul
usäblubbäräd
ung grooss uufgangä

Foor äm Moond hän
zeescht ganz wiit äwäg
fasch nu wi chliini Pünktli
un tän chliini

abä bald gröössäri Schtrichli
schwaarzi tünni Schtäkä fo Manän
un Träät fo Fräuä tanzät

Un tän sinz immä näächä choo
immr nächr und näächär
und no gröössär
und no gröössär

Daa sch dä Fips cho

Äär isch äifach daa gschtandä
ä chli win än Häiligäschii um dä Chopf
hindär im isch nämlich
gra tä grooss und hell Moond uufgangä

Wa machäd iir daa

Dä Neemo sch gschtorbä

Ch ha mi krazäd wils mich übäraal
gschtöchä um pissä hät

Dä Neemo sch toot

Wa machäp mä jez

Dä Bapä hät nüü xäit
Äär isch äifach dee gschtandä

Dänn hät r mä mis Ruksekli gää

Äär hä tä toot Neemo a bäidä Bäi gnaa
und än dur s Läub zeert

Dä toot Neemo sch schwäär xi

abä ganz schlap

T Ärm sind äm hindärän
unz Hämp isch äm fasch übä dä Chopf
grutscht

Bi där eerschtä Holzschwelä
won unsichpaar
undäräm Luäb
kwäär übä dä Wääg glägän isch
isch äm Neemo sin Chopf ghopsäd

Zungän isch äm usä ghangäd
und ich han Angscht übä cho
das r sich chän Zungän apiissä

Dä Fips hä gmärk
tas äs soo nö gaat

Hilf mär

Ich han ä müsä dä Neemo hebä
Dämi tä Bapän iin hä könän uf än Schtäi
ufä lupfä

Soo sch dä toot Neemo xässä

Sezschtäi nämp mä daas

S hät no mal zwäi Sezschtäi pruuchd

Miin Fatär sch wi xäit
än zimli chliinä Maa xi
un tä Neemo
äng groössän und än schwäärä

Dä Fips hä tä Neemo abär am Hangglänk
a bäidän Äärm gehebäd
übr sini Achslä glupft
un zoo sim mär zämä dur dä tunkli Wal
gschtolpäräd

S MoondLiächt isch tur Pletr
ä nö pessär durächoo
als am Taag ZunäSchtraalä

Un zoo häp män adä mäischtä Schtelä
würkli nü xee

Dä Bapän isch mit äm Neemo zwäimaal
umgheit

Seerschp Maal
ischr im TUngglä
übär äs Schtäimüürli
sogaar fom Wääg abägheit

Nach äm zwäitä Maal hät är gfluächäd

Gopfätekl

*Dä beschp Fründ
hä*

Än blöödä Früm pisch

Än Souchäi pisch

*Son äm fädamtä
säuschwäärä
sousiächä Chäib tuu nomaal*

Ch han äm Fips foogschlagä
das mä dä Neemo doch
wit Indiaanär
chänntäd uf än Schlittän
us zwäi tünän Escht ladä

Mä müsst numä t Escht
mi Gschrüp zämä bindä

Abär im TUngglä
häm mär kän Esch könä go suächä
un tä Fips hä xäi
tas är siin Töff nöd wiit unä draa
abgschtellt heb

Nach öpä nomal föif hundärt Meetär sim
mä dän äntli zu dä Lambreta cho

Ja wi söl ez daas gaa

Dä Bapi hä tä Neemo übär än Siz fom Töff
gläit

Abä d Ärm um Päi fom Tootä sind uf bäidä
Siitän am Bodä choo

Un tä Bapä hep müsän uf dä Neemo
ufäsizä zum stüürä

Daa hä tä chlii Maa dä grooss Neemo
zizligän uf t Lambreta ufä gwuchtät
t Äärm uf dä Länkär
unz Füdli fonäm uf dä foordär Siz

Und äär isch hinä draa xässä

häh mi knapäh Not no chönäh um däh Neemo
umän an Länkär langäh

Äär isch im Läärgang aagfaaräh
häh Kuplig la schliiffän
un tä Motoor soo aapraachd

Chpi hinäh drii xekläd
abäh nöd wiit

Däh Fips häh zoo
um däh Neemo umäh
natüürli gaar nü xee

*Du musch näbät öis läufän
ump mä däh Wääg zäigäh*

Das hani dänn ä gmachd

Wo däh Fips und iich
mit äm tootäh Neemo uf däh Lambreta
bim FäriähHüüsli aachoo sind
simp Fräuäh un Kin tussäh gschtandäh

Sisch zeesch ganz schtiläh xi
wo däh Fips däh Motoor abgwüür gha hät
ump fasch umgheit isch

Däh Neemo sch äifach ap
und uf däh Bodäh gschlipft

Taa sch är glägäh

Abäh dänn isch sTheatär loosgangäh
wilp Fee hät ali Truurszeenänäh fo iräh langäh
schäuschillärischäh Kariäräh durägschpill

pis äntli nüüp me gschpil xi isch
un zi nuno liisli prüäläd hät
wi ali andäräh ääh

Mängisch häh zi
mi zwäh drüü iischnuufändäh Zukigäh
ächli gschluchzäd

P Fee isch nöd nu Schäuschpilläri sondärn
äp Fründin fom Neemo xi

Däh Neemo sch äifach too taaglägäh
mi fädräätäh Bäh
ump foläh Dräk
im Liächp fo där offänäh ligangstüüräh
und halbän im Schatäh

Däh bluti Buuch fom Neemo
hät no tikär
undäräm ufägrutschtäh Hämp fürägluägt
unz häh scho widär ächli gschtunkäh

Toot äifach toot

Ch han ä prüäläd
und weläh p Fee adäh Hand hebän
abäh diäh häh mi fäschrokän abgschüttlät
wi wän ich gruusig wäär

Si isch am Bodäh ghokäd
mi tä Händ um Knüü
und äm Chopf uf däh Chnüü
und häh zich for un zruigg gwiägäläd

Ch pin i Kuchi
und han öpis Zässän übächoo

Ch ha zum ChuchiFäischtärli usä gluägät

Im ligangliächt sin ganz fil Insektä
umänand und duränand gwimmlät

Grilä häng ganz luut zirpäd
und iigänd nöimät
häp mä dä Zuu ghöör tus Taal faarä

P Fee isch immä no näbäd äm tootä
Neemo ufäm Chiis xässä
win än fägässnä Wagä fom
Chindägaartäschpiili
Tschutschuschuu än Isäbaan chunt

Ch wär äm liäpschtän äifach hindä si anä
xässän
und he Knüü asi anätrukt
ump mich mit ärä fürän und hindäzi
gwiägälät

Abä ch ha mi nümä getrout

Öb äch tä Neemo irän ä fäzelt hät
win är Schwümä gleert hät

Ch han äm Neemo im
FüürweerResärwoar zäigät gha

win i Schwümä un Täuchä cha

S Resärwoar isch äs Bräämä fäsüüchz
tüüfs BetongBeki xi
mit ärä SchtaalLäitärä
won is Bodäloosi Wassär abä gangän isch

Ch pi dus Beki durä
mip fil z raschä Züüg
wi jedän Aafängr won Angscht hät
ää chäm nö gnuäg Luft übö bim Schwümä

Dä Fips un tä Neemo sind äu is
säichwaarmi Wassär inä cho und häm mä
zäigät wi mä fil langsamär machä chan

Mi händ Wassr gschtampfad
und hämp Früuän un ti Chliinän
aagschprüzt

Un tä Fips und iich sind adä Läitärä naa
so tüüf abä
das äs ganz chalt un tunkäl wordän isch
sichä drüü maal so tüüf win iich groos bin
öps gläupsch odä nööd

Zeichnung: Wald Spaziergang fo dä Ayleen Stillhardt 2017

Copyright© Sidi Har Meschi / André Seidenberg 2016/17